

【暗晡頭个海脣】彭瑞珠原作

暗晡頭个海脣，無麼个人，天頂个月光，畏差个因在雲背；
拘禮个海風，驚生份个吹一陣又恬一陣，出海口个海浪，慢慢
板在該激啊激仔¹。無人出入个魚市場裡肚，斯單淨留等，幾蕊²孤
栖个電火，還過，幾臺推啊推仔³个抽風機。

魚市場外背闊闊个停車場這片，擎花擎花仔⁴停等幾臺自用
車，還毋想睡个駛車人，有人帶等罐頭來供流浪狗、也有人帶等
釣槓來湊月光釣魚仔。魚市場該片遠遠个停車場脣頭，幾下個越
夜越有元氣个後生人，載等掛有大喇叭个音響，摺車後斗撒向
天、三臺車仔比比企，在該咚滋咚滋⁵尋月光共下跳舞。

正手片个音樂聲撓⁶到恁个腳底痠痠⁷，毋過，左手片騎等過个
兩臺奧多拜，錫著恁个目光。恁跔等佢兜个身影，行上兩百八十

¹ 激啊激仔：音 gieb` a` gieb` er；液體來回晃動貌。

² 幾蕊：音 gi` lui；幾盞。

³ 推啊推攪：音 kog` a` kog` er；此為形容機器轉動的聲音和狀態。

⁴ 擎花擎花仔：音 lo` fa` lo` fa` er；稀疏間雜著其他花色的樣子。

⁵ 咚滋咚滋：音 dung` zii` dung` zii`；形容電子音樂的節奏聲。

⁶ 撓：音 neu`；搔、抓。

⁷ 痠痠：音 hoi hoi；癢癢的感覺。

公尺長个笨鯊橋，想去看，掛等頭燈个兩隻網魚人，係愛網麼个
魚仔？月光也勾頭出來咧，一浪一浪个水紋，在月光下看到清
楚楚，一張魚網、兩個網魚人，落網、收網，撈起來个係一網个
月光。雖然，連魚屎都無，毋過，佢兜還係有講有笑，恁想，佢
兜怕係為著愛打嘴鼓來个，網魚仔，單淨係兩同年想在月光下共
下療个理由定定。

橋下个河壩水，也認同恁个想法，「係啊，係啊！」緊應緊
大聲，恁緊聽緊生趣。毋過，摺佢看真來，該「係啊，係啊！」
个聲哨，怕係河壩水分海浪打轉來，抑係海浪激上河壩水个聲
啊！

毋多知仔，就分恁行過笨鯊橋咧。橋這片，日時頭分人箭到
穀穀个自行車，這下通棚一列一列企好、企正，在月光下恬靜。
光華華个路燈下，無人上下咧，斯單淨一隻指等螺殼个毛蟹，對
白沙堆勾頭出來又圓倒轉去，對路脣越過來又越倒轉去，自家在
月光下搞困人尋。恁企在路脣，看毛蟹、看流流流流个河壩水，
在共樣个月光下，當像分恁看著，頭擺，該一大陣笨鯊入港時，
客家打漁人佢兜面町⁸个笑容。

⁸ 面町：音 mien` nen`；臉上。

【夜鷹】邱一帆原作

毋記得在哪時起勢，佢輒常在斷烏¹，聽著天頂傳來「追佢啊追佢，追佢啊追佢」个聲，一聲又一聲，一直對半夜喊到天光，該吵耳塞窟个叫聲，正會對佢个耳空肚消失。當多年前，佢第一擺在屋下聽著該恁尖恁高个聲，實在當佇毋著，訂訂行出屋面前去看。該烏鳥像細雞子个身影，在天頂飛啊飛、辽啊辽仔²。成時，毋知係飛到恁咧，抑係麼个，烏黔烏黔³个鳥身，會頓腳在屋頂，「追佢啊追佢，追佢啊追佢」个叫聲，還係一聲喊過一聲。

該係麼个鳥？聲哨仰會恁吵人？佢遠遠走轉屋肚去，當認真上網路頂去尋資料，尋上尋下，正發現該種形投个鳥仔，名就安到夜鷹。想起來試著當奇怪！早早在 1861 年就有有人在臺南發現佢个影跡，離這下有一百五、六十年咧，既經算係臺灣特有亞種个鳥仔，對山頂到平洋、對莊下到都市，滿哪仔都看得著佢个身影、聽得著佢个叫聲。做麼个佢食到四十大零歲咧，正第一擺在南庄聽著、注意著恁樣个鳥聲、知著恁樣个鳥名呢？佢試著當敗

勢！敗勢自家無好好認識，一直生活在身邊个鳥仔。

逐年新曆二月到八月，係臺灣夜鷹尋伴个繁殖期。七隻月恁長个時間，逐隻烏公就想愛尋著自家理想个對象——鳥嫲，互相培養感情，繁殖下一代。也一直愛等到孵出後代，細鳥仔會飛、離開烏公、鳥嫲个保護，正算完成傳宗接代个任務。所以，在這期間，烏公對斷烏到天光，會緊喊出「追佢啊追佢，追佢啊追佢」這吵死人个聲，來宣示領域，嚇走其他可能个入侵者。也因為夜鷹个聲哨難聽又大聲，有當多好恬靜驚吵个人，就恁樣分夜鷹吵到睡毋得，閑到望毋得夜鷹遠遠消失忒！

佢知夜鷹个聲哨當吵，吵到人食睡毋得，尋伴个繁殖期間，確實影響著人个生活。毋過，夜鷹毋係無一埕好，佢對環境也有一定个平衡⁴作用。夜鷹个臂膀到又闊又利，會用來搶食蟲仔，不管係在暗暗个天頂抑係光光个路燈下，大水蟻、金姑仔、草蟻，還過當多蟲仔，就係佢个食物、佢个好味緒。因為夜鷹个捕食習慣，多多少少也維持等該兜蟲仔个數量，也保護著生態个平衡。

¹ 斷烏：音 ton`vu`；入夜。

² 辽啊辽仔：音 din`a`din`er；轉啊轉的。

³ 烏黔烏黔：音 vu`him vu`him；淺黑色。

⁴ 平衡：音 pin fen；指一個物體的運動維持不變（亦即沒有加速或減速）的狀態。

【芋苧葉个智慧】謝錦綉原作

這幾年長透會在報紙、電視新聞看著，魚仔肚屎肚有各種个塑膠絡。

這下，因為塑膠絡便宜又利便，不管燒个、冷个、冰个東西，總下用塑膠絡張。無論上山、下海，大隻細隻个塑膠絡，用過就掉忒¹，大家慣勢恁樣無限制个使用塑膠絡咧。

三不二時看著新聞報導，海鯽死在海胥，研究人員破開肚屎，發現海鯽毋係發病死个，係因為食忒多人類掉在海賓肚个塑膠絡，無法度消化正死忒。海鯽歸身都係塑膠粒个毒性，其他海魚也共樣，人又捉魚仔來食，這毒性又轉到人類本身來。結果就恁樣輪迴，魚仔源頭減少，大環境污染，人類自家也係大食物鏈其中之一，健康當然受著盡大个影響。

今年正月過忒年，恁對嘉義上來臺北寮一、兩個月；恁姊戴新店山頂，有所在好種菜，逐擺有菜好摘，佢就坐車仔拿來分佢。

第一擺拿著佢用紙絡仔張等个青菜，佢先放冰箱，等到愛煮

時節，正打開紙絡仔看，唉哦！正知紙絡仔裡肚還用三層芋苧葉包等，毋係用塑膠絡包。佢就想：「阿姊啊，你正經珍毋着時代咧！這下還有麼儕用芋苧葉包東西？」佢偷偷在該笑阿姊。

煮飯時節，佢先拿一種菜出來煮，吉食个菜照原旦用芋苧葉包轉去，共樣放在冰箱。過兩日仔菜食忒，去拿第二種菜來煮該時，打開芋苧葉，無想着，包在葉肚个青菜，還本本萋萋，到這下，佢正知芋苧葉恁好用。

這下个時代，科技發達，大部分人總係認為新个發明較進步，所以輒輒舊換新，舊東西大家就掉忒。毋過，不管新抑舊，大家總愛想較長久、想較遠兜，該兜毋會綿、毋會攷个垃圾，越留越多，留到最尾，地球斯會分垃圾搥忒²。到該兩時，人無法度戴地球，後代子孫也毋知愛去戴哪位正好？

芋苧葉毋單淨做得保存青菜、魚仔、肉，還比塑膠絡效果較好。東西食忒，斯摻芋苧葉掉忒，佢轉到地泥肚，自然綿忒，就會變成肥料養分，全無打爽。芋苧葉無毒性，毋會污染環境，顛倒分地球淨俐，分人類健康，這條頭擺人个智慧，愛記得正好。

¹ 掉忒：音 tiau¹ ted；丟掉。

² 搥忒：音 eb ted；覆蓋、掩埋。